

四庫全書

集部

欽定四庫全書

集部
對山集卷九

詳校官中書臣孫溶

中書臣劉源溥覆勘

總校官檢討臣何思鈞

校對官編修臣沈清藻

騰錄監生臣徐汝雄

欽定四庫全書

對山集卷九

明 康海 撰

賦

夢遊太白山賦

余歷覽載籍所志古人之辭由屈原宋玉以來
不可勝計而浮靡侈放之辭蓋托諷寓興者之
所共趨上林之後益無益漫亡能爾雅志士之

所賤也余感風人之義因夢遊太白山歷見竒
瑰駭異之狀孚於人言退而作賦凡若干言雖
極假借要皆自喻其迹少有虛謬諛駕凌絕之
病示諸同志皆曰可錄

弘治闕逢攝提格終相之月康子夢遊太白與金子可
卿乘馬領僕各執糧糗飫飼之物浮漆渭跨郿塢環惇
物逾武功去約萬里四望塞蔽恐怖獐突惶惑震厲若
將遂為虎豹之噬有老人者雪髭鶴髮電目龍頭自西

而來若愛若識請以前路則笑而不言少頃復去金子
曰若非山川之精邪豈將疑我以迷晦顧我以虛詼也
乃躡於其後則豁然四開巒回徑折泉下雲散予曰是
未可止也夫八紘之廣獨有太白盤礴崦嶷瑰嶂崎嶇
神靈秀明崑嶺業薛夫是但謂未麓近壑然未邃也乃
與虺蜥仄石轉附垂藤升矚巉壁靜嘯絕坪忽萬里之
瞬側何溟渤之未窮雜卉蒨葱石泉沸騰嘉樹驂乎九
御神風颯乎太紘駮駟散乎銖粒蛟螭視乎細繩電光

恍乎山足雷聲浩乎廣聽零露凝其在衣松濤悠乎啟
聲金子曰快哉遊乎夫造物者假我以聖智崇我以令
德我弗用觀奈此膚景遂直詣而不回何茫茫之勿騁
乃爾若神物之可憑歷千巖之邃嶺山石儼乎華高細
流浩乎滄溟蓬蒿翳乎峯壑墜葉震乎雷霆老人跨鶴
從雲前下笑曰異乎予之善勇也夫太白始峯炎暑冰
洳萬夫之勇亡有敢及况迫於是夫是泉脈應乎坤軸
遮飾極乎越區天扃邇乎可聲神祇恍乎可呼至循崖

之前重谷之裏百鳥不宿神獸亦避雖至人亦蔑有入也越此百里西下陰壑復關峻嶽則金屋龍棟控亢聳搏異花雜乎瓊瑤僊風冷乎清綽靈芝馥乎滿郊麒麟馴乎盈郭龍蹇屈於平池鳳翩聯於長漠此則上帝之秘區而太白之關鑰也其東百里瑤宮葢殿萬戶齊啟蒼光青氛四回周起函丹書於億笈紛朱絃於兆徵散靈繭之如斗歷綺轂之竒靡總百綵而具存奚瓊桃之如纍此又太乙之宅合陽之宮至其南也朱雲陸離丹

閣霽霽神桂宿日南極奉塵羽翰極乎麗暉珠貝極乎
雕飾鵬鶚駕而鳳軒鯨鯢御而兕履是謂朱明之宮天
帝之闕北則至幽號曰元府紫微之所宿萬象之所聚
玉臺瑩光冰柱炫色珊瑚如林水晶四徹雲沆漭而守
默氣鬱鬱森而馳起靈龜元龍參錯其下松檜接乎帝閣
金碧曳乎泉石翼八獸以守衢役百神而司臬夫皆五
天之至精萬化之樞紐能有至者皆必具靈負秘與抱
圖膺籙之士有天人德者也已而風柔香墜路豁視

空若雙龍之負引修靈宇之就中僊姝麗乎兩間洞簫
錯乎萬笙皓歌凝乎飛泉朱絃颯乎翠空座列煥乎雲
端境象委乎穹窿環珮鏘乎旖旎禮數儀乎動容予乃
攝衣升堂長揖就位悟人世之囂紛歎靈扃之皇闕乃
與金子終身同丈人居之不去

憫志賦

嗟嗟余窮兮孰余之厄余行欲修兮予處之索一裘弗
完兮糠粃曷擇冬長寒冽兮暑亦奚綸上帝孔惠兮既

昭予宅曠而弗居兮實予之責嗟彼高人兮胡有不獲
予曷獨難兮有行必盡歲月不留兮憂心如劓嗟彼朋
友兮各謀爾懌吁嗟奈何兮孰予之格達人相逢兮自
彼古昔匪予一人兮烏敢不措

琴曲

太白操

太白兮何為日中兮揚輝昊天兮孔明我陳兮誰聽排
徊兮路窮自顧兮傷衷

握手歌

春日遲兮景芳鳥鳴啾啾兮孔陽與君握手兮相將前
度飛坂兮後岡同心之音兮自長矢中夜兮未央

四言詩

悔過詩

徂齡不來謝景詎待覆杯莫收燼灰罔再青春隆隆白
日杲杲自飭弗勤如彼蔓草或潤而達或槁而衰緝而
熙之非予則誰予自謝黜益驕以倨心騫志翔曠視萬

世哲人則敦愚人則疲匪予之疲予惟斯謬眷令知風
鴻鴈知洌賢則志昏旤安有竭徃或弗知今已甚明逝
茲靡創將大且橫武公戒抑夏祖畏口繫彼詰人胡寧
不守斑斑虎皮言設之几交交繁言道則何理尼父惡
卯誅以司寇舜憎四兗位在元后孰云齊民乃怨乃慝
若彼水木旤發必克皇運廣大布德商周閔予置予祖
考之休日月方長德輒云坦伐柯視柯其則豈遠季春
壬申日在辛酉武歌不支可以永久吾言罔反爾行孔

棘君子攸崇是戒是力

五言古詩

於澣西別業同承裕升之作

還耕愜初願揖世返空林雖非志士理已獲靜者心嘉
賓清雲客枉駕忽相臨攜酒共斟酌張絃揚妙音義厚
情自叶道合契滋深漪漪漳川水幽幽南山岑相值不
相樂奈此逝者侵

四月七日雨中同文浮山坐作

初夏草木長鳴雨更相逼來年生意佳枝旃望如織陽
日不下臨此物終且蝕往者已已夏頗為旱乾棘徂春
苦無雨兩麥俱豐息因懷老農語往往未差感窮居繁
口食所恃耕耨力明日更如此與君甚胸臆

行至曲里見杏花

春中渡河陽倏忽到曲里滿村開杏花參差亦堪喜關
吏自北來云承呂夫子遣之迎野翁謹愿頗謙禮迷答俱
有章稽援或通理感歎君子居端能化凡鄙隔歲慕

良覲不謂通若此芳春解人意夾路疊紅紫宿醒方苦
人畢覽興彌起

子卿泣別圖

積怨世豈惻感別會仍艱置酒話夙昔詎終千萬端嘆
息淚沾臆徒令摧肺肝昔為雙飛龍今為孤翼鸞丈夫
耻微諒况爾烈士顏躍馬窖上別欲歸中自難徒切報
主恨安悔軍吏言勝負有微數奮勵心所安所以君子
人不處嫌疑間

於近山尚書莊上作

春風纈芳林虛堂翳脩竹苟愜靜者心寧慙世人目昔
予懷此遊悠悠幾更宿宜期聯輿來沉醉臥茲曲高歌
嘆往蹤遐眺覽前躅主人古司徒雅興薄裴陸但能永
今夕何憂之醺醪

寄伯循

秋風西北來偃蹇坐茅屋四壁無纖塵當牕有書牘不
問作者誰啟牕再三讀一讀意已駭三讀見衷曲憶昔

年少時心志各有蓄不意謬通籍先君被薄祿朝夕望
君起如彼饑者穀我已罷館職君方應官祿味苦不可
人旋車亦何促主上堯舜姿舊章理當復平生稷契心
豈為世情覆尚期謹藥石慰此百姓蹙予也素寒劣茲
志每中孰屢犯涵遜懷幾構邪罔獄顧影苟不虧於道
果奚辱山水性所嗜喧恢宜吾欲屈指君歸來三年但
忽條人生不滿百激勵在初服可似山中人忘機泛醞

醞

讀史

鴻雁不老越蛟龍不潛岡平生志嘉遁佐儲抑何狂因
嘆務光輩惻惻令心傷傳記尚溢美其言或荒唐嗟彼
高帝業赫赫繼三王孺子安所見胡為遽辭商契會視
豪傑出處聖所詳感嘆擲其策願為史臣俎

其二

天邊有黃鵠高飛一千里烈士耻庸節世事特敝屣朝
辭上東門暮從赤松子感慨風雲期超悟往還理進既

有所因退亦何所倚獵犬貪兔狐不免竈傍死富貴多
嶮巖英雄如螻蟻所以明哲人窮達重狗已

至終南

泥濘抵終南迷蒙失山色指點太平宮崔嵬白雲極不
暇自抖擻冒雨且綜核憑高睨村落嘉樹萬重黑此地
索靈異氣候故不測旦日雲氣消嫩碧競寰域綠草彌
望浮波光與山逼迤灑白鳥來滌蕩千慮息宿性喜丘
壑躋攀易筋力深秋事佳遊長歌厭輕默早晚幽下築

終以臥斯側

閒居詠懷

窮居無別悰，掃徑揖清靄。
濁醪自斟酌，幽花復芬馥。
雖微恣性歡，亦鮮迷津慨。
寒虫相續鳴，潦水參互沛。
節物漸以更，人事紛相代。
猗彼巢由徒，曠音昭物外。

盤屋喜太微至作

此日復何日，眷言會君子。
方擬躍馬尋，忽焉且來止。
來止將何為，握手論文史。
春城沽酒佳，斟酌一何喜。
晉緣

古仙遊山水嘉無比若賦南山篇請君自茲始

許西喜明叔孟獨二君子至作

我本支謾人嘯歌許西曲心喜談道術性憎傍塵俗二
君英俊才世事豈拘束同遊終南山文采奪人目數日
返墟里此意常在腹因念蘇與黃聲臭一何屬我有輞
川吟鄙近不可讀請君勉和之永為此行馥

示習方

汝母我之姊同胞無別親不幸去年死玃玃惟汝身汝

父既早沒汝依當何人數數與汝語令我淚沾襟汝性頗靈慧力作何不勤青春易凋喪歲月良可珍汝能事卓立非止裕汝屯指名為令士汝親當見伸何苦遂遊冶弗肯志討論撻之尚不易况乃頰舌云汝祖好男子豪爽多譽聞辛苦教汝父冀登要路津汝父乃不殺漂蕩成苦貧幸以汝母故托居我南隣黽勉相勸諷靡能禦寒溫謂將致興發豈意掩泉墳遺汝無寸土汝母復長淪近日之良吏役賦甚紛紜富者尚難理貧者安可

狗不見臺輿者四體如火薰不見負輪者鎖柱令肉皴
我年已五十豈得常逡巡作詩以告汝請汝書諸紳

於高陵壽明叔初度

為薦呂夫子因之涇渭川中道遇來使慙慙出素編久
知滯王役不謂會此塵晴春懸明月惠風乘遠天木末
雙輿至迎我城西阡握手但相笑恐是夢寐然宴我旅
人舍坐我紫旒羶童子出名酒飲如鯨吸川呂君賦葛

苗予具南山篇

過張子西谿作

自予抱幽戚三載鮮遊眺春日忽言征聿底滄洲妙柳
色參差生芳意遠近耀張宴臨谿波彈琴遞清調惠風
當襟懷遊賞恣舒嘯匪效蘇門狂將追虎溪笑少日牽
王役結綬事廊廟麤直雖見稱齷齪果成誚醜稼許西
曲探竒歷幽微嘆君本素心晤言希久要

答仲木

適性即為樂處安寧怨貧客來遺我書乃在涇水濱再

拜讀此書道意何慇懃昔為鸞與鳳今為參與辰相思
千萬端縷縷難具陳浮雲蔽白日遊子殊苦辛道遠行
不易戚惻傷我心

答桑華州

桑君英妙人恨與識不早脫穎豈性成豪爽蓋天造再
會益瑋瑋故言皆了了眼底似君稀勉旃為世瑤半年
下山寺乃趨坊里道所過六七村村勝城堡柝聲遠
近連人家氣色好共言今兩年懷抱絕不惱

仲木至夜坐作二首

錄一首

我前抵華原訪子雲槐舍偶值何仲默清談忘晨夜冲
懷世寡知繁文俗方化芳臭不同科辯別每未暇羣口
雖見珍私心竊常訝莊生吾馬云其見豈欺詐後會王
敬夫飄然契茲話乃欽吾儕真益陋杞妻下澣西春酒
熟南山翠如射明日會同君細看盤谷畫

園林瞻眺同仲木作二首

古意世方疾太音人和稀豈不逐羣好恐與賢達違朝

遊三時原暮宿唐山磯感此榮悴異已悲馳騫非所以
素心者見之心每希灼灼園中花撫撫南山微及茲不
努力老大將焉歸

膏雨既周徹田工麤可期黽勉命童僕籃輿詣東菑欣
此麩麥遂坐令芳意彌業歲望豐衍行樂值晴熙况與
良士同更愜山水思擊筑發古調彈箏奮新詞夜以繼
白日瀟灑孰可追

聽雨

達旦不成寐卧聽秋雨聲雨亦竟不歇吾意何時平前
年秋八月淫雨百穀盈禾稼盡腐黑况云屋圯傾此雨復
彌月巖崖千里崩不知上帝意豈欲移蒼溟吾生殊坎
軻一紀事農耕兩田俱不稔百口常見嬰奈何越庸調
已欲樵棟楹老妻向我道但坐且勿驚人事尚莫定天
道寧易明脩短有恒數豐歉惟所丁牀頭有美酒馨香
盈玉瓶君姑自斟酌可以助頽齡醉卧忽將午此物方雷
鳴

張甥之桀自華西來省予與之開尊夜坐辭以辟
酒數月之桀少年英妙勵志若此誠已罕矣因賦
詩贈焉

勵志古猶鮮嗟爾英妙人超然契神理謝此麴米春盛
時富遊燕昌齡當令辰但恐樂不滿安知中足嗔所以
賢達士寸陰日以珍張甥出名裔磊落吾所親奮迅冀
往哲慷慨懷先民述此止酒事言辭皆絕倫彭澤雖有
作徒以慍同塵豈若慕宏達精詣吾道津事以久乃定

節懼中路屯願言永初服白首以為真

答都人

還車許西曲半山含暝色朔風刺我衣欲止不可得入
城逢都人白馬啣金勒下馬揖車前被服甚竒特授我
一緘書題識頗修救展書讀其辭耿耿亂胸臆一別十
三年安知如頃刻勞君遠問訊况此常相憶習靜厭世
喧冠冕志頗息秦馬不嘶越南鳥豈棲北野人各有懷
所務在稼穡慙懃謝都人去去慎登陟

詠懷二首

錄一首

悠悠不能寐惻惻與心違
百歲若一瞬怨言長分飛
結髮遡伊始寒帷念餘輝
紉蘭坐崇阿調絃拂金徽
志願各相許寔幸同歸
豈期中道別空餘衾與衣
臨風想德音當牕拭殘機
往者既莫諒嗣者安可希

從象峯北崦下望普緣

陟山披叢薄覽景愜幽素
降觀萬壑奔平臨千嶂赴宿
愛彌見欣新賞豁相聚未覩
赤城遊彷彿興宗賦

送灤江中丞西勘

秋雨復如注，旌旗仍赴西。僕馬不能立，杯酒那可攜。公
歸定十月，山莊事麤沒。新釀既已成，嘉穀有微蕝。即今
構小亭亭，成竚公坐。雖無絲竹陳，可試風雅課。南山秋
暮佳，氣色清且翠。眺覽既中愜，嘯歌或幽邃。此役干國
經天下，由重輕古哲。務成事令人，唯釀名往往。十年邇
邊陲，太乏理輿皂。皆所親毀譽，出憎喜。雖悉延訪心，紛
亂若絲泉。積今日益滋，君子復輕信。自謂根蒂獲，豈有

纖細近治邊如治鮮要在審其勢剖斷貴神速宰制厭
牽係近聞甘泉城皇皇盡危懼主者諭不開倉卒何以
計遠人遵訛言其情易搖曳片言崑崙摧轉擬萬夫斃
公固豈弟人弛張有程具向既失緩急今且須砥礪同
事六七公休休皆偉器當事必安舒臨機戒輕薦嗟嗟
千里心顧此豈能白亦知芻蕘微贈公異公擇

姜君錫過予作

君家篆江側秀屏當戶開知是神仙人胡為塵世來黃

氛縑素車皂蓋冒朱埃以茲謝民役返耕白雲隈少小
稽古昔中式得此階亦知慎官服奈與寸心違欲往昧
前算欲止遽成哀繫予丘壑士諦此良用駭因陳接浙
義頗究蓬矢懷我固互相發君固耿難回丈夫志四海
好念濟川才嗟彼長沮徒泛泛豈根荄

送大理西勘

返耕厠幽壑服義屈高軒握手立斯須傾倒見雄論昔
宦志孤陋中路忽履屯負罪苟不死茲已含溢恩疎懶

循故性竟志紉山孫感君繾綣意幡然謝前聞殺鷄饌
雕胡列坐開華門斗酒醉方已徘徊惜日曛今夕別君
去孟冬定迴轅尚期撰杖屨共眺南山雲

寶穡堂作

明農謝昌官良覲羨予征敦義昔所重况此骨肉情嗣
歲節物改朱陽喜開晴感念歎伊昔發車臨廣庭所期
德音邁永脩三徑盟

平生尚超曠結廬武亭川本非青雲姿竟作金閨愆托

交三十載孤抱亦何淵
邈觀古昔事彌想梁甫篇感此
發深省誓以俟餘年

彭麓夜酌

露坐架棚箔鄰翁高興多
轉觴話農事絕勝陳綺羅
西村二三子攜酒復相過
忽忽至更盡悠悠奈樂何

觀禾

我來彭麓下坐愛青山色
雨過忽新涼蒼烟望無極
秋禾行欲成豈畏驕陽逼
壠畝綠如屯原隰少螟螣
同欣

有年樂詎知天子力

解梁書院四首

層峯拱堂宇蒼翠何崢嶸
盈盈青衿子絃誦夜不輟
斯文今在茲感嘆懷往昔
繫予值乖蹇望道日遼絕
衣冠羞壯遊疎懶愧先烈
結交君子徒努力
崇明德變故身屢輕
涵養意恒切
歲序不待人
君子慎其節

其二

諸君青雲姿
宿志各高尚
奮迅良有期
優游每中諒
修

禮慎逸居稽古却支宥得師忻折衷遵道決趨向我來
坐茲堂誦習惟覩創始信豪傑人履歷不虛妄科條從
昔云謙恭見今讓文采雖所珍躬行以為上

其三

近世尚夸毗造詣實終鮮徒以言語微遂謂道昏顯推
行跬步艱况此繼墳典狂瀾及明興愈覺支麤淺徒有
析理名竟為粉飾免天錫涇野君特被人文選篤行遵
誠明因時表舒卷吾道果不絕覲此脈如綫

其四

猗猗青衿子，勵志各有圖。逸志凌天雲，麗作驚九區。或
為廟廊器，或為章句徒。華豐實乃嗇，枝榮幹還枯。豈若
剝雕琢，逝為君子儒。所需出所養，與世作匡扶。藝穀諦
嘉種，種木審良株。我詩揭堂左，百爾慎所趨。

贈寒泉中尉

澄瑩絕纖翳，一泓瀉千里。寒月搖輕波，山光徹波底。魚
鰕不敢遊，虬龍得猗狎。轉盼清素心，挹飲滌凡鄙。平生

畏炎蒸見之輒中喜願言保真寂勿以塵氛浼

贈灤江公十首

灤江公巡撫關陝三年矣政通而人和道真而
履固不隱謗不易行有仲尼在魯子產相鄭之
風焉予自壬午春遇公於長安時予卧疾敝廬
公特往臨握手論心亶亶不倦雖丁陶孟韓何
以過也後公訪予於澣西山房適北山楊宗文
漢陂王敬夫東谷張用昭有唁於予於是數人

者同會公於武功行臺公咨詢之餘則賡倡連
宵琦瑰之氣爾雅之作揆之近覩或已鮮矣今
年秋公擢南京卿戒行有日公以書別余昔予
與公約公東歸當餞公華山之陰聞公行止信
宿而予有子稟婚娶之事因成小詩十首先以
寄公十三日稟事當畢即擬來日躍馬循驪山
而東然後坐希夷之洞睎河華之雄酌桑落
之酒歌白雲之章與公傾倒數日則亦人生

之至願也夷嘗讀公之文與詩有風雅之遺思而驟車復在於冬中於是取少陵北風隨爽氣南斗避文星為韻苟傳之將來斯亦當時之實

錄爾

輶車戒晨發循此東南域握手立斯須徘徊意安極念子有幽思別言心如織昔為同生蘭今為特飛翼人生易悲樂良晤昔所恤黃塵暗清渭對殮安可食嗟嗟君子心遐眺在燕北

昔並少陵騎長眺望夷宮故都多景象近蹟迷往雄感
慨發孤詠宛若思悲翁粵惟霸上垓已昧天所窮自非
大雅操詎識卑與崇挹泉漱寒碧酌醴揖羣公志直意
不忝巍然君子風

關輔比多事欽公能自綏養冠蓋往昔弭亂豈今訛崇
貨狎卑吏飾貌忘遠規公來屏笑色事至任安危素衷
物莫浼逸駕古所窺雖有羸裘謗倏動赤舄悲所以
丈夫行不與流俗隨

逍遙奮孤邁，歲徒愜淵想。北眺崆峒津，南澗孟諸塊。麾
塵靖疆場，撫劔清罔象。黔庶丁溢恩，牧宰獲嘉賞。中原
久瘡痍，西州獨豐穰。感歎乖崖心，詎俟益州榜。夷誦南
山章，令人發森爽。

道以無垢尊，蹟超誠所貴。皇皇廊廟姿，世運實經緯。翩
翩翊鴻業，皎皎分萬彙。嗟自丁卯來，海宇日騰沸。羣
公徒憫艱，虛恢果奚謂。薄俗慕驩虞，君子念鷲贖。魏
魏城邊畧，足回萬夫氣。

披叢憩軒下撫卷輒中慚笑我伎微薄無能續高駘緬
思雄詠侈一發連數函咀嚼味逾雋詠歎誠所艸贈瑤
似劉傳酬德悵廬參清風盍將遠鄙志揆豈堪那知邂
逅際復送旌旆南

公歸止信宿予餞苦淹後耿耿徒憂傷役役定誰咎憶
昔承明直相企亦已厚公念薄綺紉予質等蒲柳雖能
慎初服終恐易衰朽樂遊觀五陵氣候稍非舊歎息君
子陳宵興望南斗

徂歲始炎鬱岩洞共公萃趨若陶公琴興越滌守醉旁
眺牛頭原橫坐竹林邃微風滌煩襟冲抱浥靈秘偶聞
林鳥鳴遽動舞雩喟公度比莘父予志豈荷貴喜貺彌

筇來欲和復中遊

曾同漢陂飲
太微洞中

悠悠長安道車騎紛如雲父老泣相謂童穉聲欲吞借
問道傍士述答甚懇勲三秦失慈母黔首懷使君餞送
順心意昊天安肯聞徘徊玩此語感慨異前云不覩澤

門誦焉契章甫文

予懷繫莫即公訓安可聆矢詩雖不多聊以宣德馨
高駕既難挽孤忠益屏營北風嗣元序節物改仙冀追
送理應及鬱陶浩豈平華山有崎嶇髮髯出青冥煩公
待予至同訪少微星

飲酒二首

錄一首

獨居意靡暢行吟心更傷晨發望原際佳氣鬱相望恨
無同懷人躍馬涉暵岡徘徊日忽暮感嘆琴屢張山妻
出美酒斟酌為君嘗三觴起孤抱百憂忽若忘丈夫生

世間磊落斯所減何須久鬱鬱自如陌上桑

白石樓

我聞白石樓乃在太行下丹梯凌紫霄朱甍接巖嶺盤
鬱橫汾曲崔魏紫金叉斜煙蕩洄滴朝暉耀簷牙兩溪
互縈帶千峯隨晦冥嶂屏萬翠列花柳四時明平生喜
遊眺詎可如孫登春中過函谷遂有渤澥行徒懷南莊
老安能愜初盟入事苦促迫三日滯虞鄉雖有泛舟趣
却無曾點狂回想王官谷新詩滿素牆不識仲南姓徒

懷詩思長便思與握手於時共徜徉同遊誦其名知是
南莊子故家有若人私為李公喜翺翔翰墨場倏忽逾
四紀不謂英俊姿尚在秦晉里何當登此樓醉汝賢喬
梓三嘆發朝邑彌月興猶起感君寄書至展轉愛君才
欲見不可得空望白雲隈吾有雙黃鶴飛飛自天來因逢
王子晉借之遊蓬萊一去竟千載寥寥猶未迴迴時坐
鶴背挈予臨高臺先過崑崙頂後瞰弱水涯徐訪紫華
君持其雙玉芝吾意竟不歇君心幸勿改寄君白石吟

惟君為予待

整籍

三年困人事何曾理書帙
鳥鼠白晝遊入門忽首疾架
閣具傾覆點檢切中怵凌晨
趣灑掃整頓倏終日種類
既品題編簡復齊一不但几
案清幸靡萬一失焚香坐
望餘儼然成靜室平生風雅
情殊以乖塞室追惟感嘆
生端坐還羞愜何如谿上
翁翩翩獨閒逸

植樹

此日春氣和萬木具含秀况我山林居園列頗成就客
自盤屋來驅車扣圭竇白楊二百株緋纚載其後根繁
生意多幹潤理宜茂倩人速植之行列未差謬雖愜靜
者心尚祈后土祐澆灌分所勤盤踞晚應覲結廬謝王
役懷愚負時謬糊口聊秉耕舒形得佳岫即非松菊場
已還榆柳舊但資歌嘯心絕勝笙竽奏

於許西贈別明叔三首

三月請茲曲八月令始復結轡送君歸投壺泛醴醪風

清懷抱優暑退涼氣淑我歌苦不長聊以詠幽獨荒徑
殘草多空堂蛛網覆豈無灑掃資紛糾在塵俗

其二

時日得君來開豁極心目夜坐對明月清談倒筐腹方
儼千日歡詎忍後期促餞子卓午天徘徊日西沒眷戀
勿復言去去保餘馥

其三

詩人古不易流靡及茲俗片言務剽竊侃侃遂驕足還

耕十三載安能愜吾欲
覽子中秋篇翩然接華轂
大雅當在茲斯文有歸宿
麗藻雖可珍雄渾久未復
願言泝其源開彼漢魏毒

登罨翠樓眺望川原

我登罨翠樓川原鬱迴合
方喜風霧開倏見煙雲匝
直東看黃山三秦如堵圍
興亡理堪惜念之凋朱顏
同把一尊酒勸君為君壽
莫負當春遊人生若芻狗

經漆村覽有郛古蹟

我聞昔人言此即漢漆縣其東故有卽草木殊蔥蒨終
南當面朝清渭過如練直北倚黃山逶迤控周甸前望
松檜場知是何王殿王蹟日以微氣色或隱見西南慶
善宮鬱當漆村面勝地遷變多往躅審彌眩繫自虞夏
來百祥具茲奠地靈昔所庇諦此竊中羨

過慶善宮

長川直南瀉清渭橫其衝灑光觸雲漢此下潛真龍欽
想還譙賦緬懷天日容地秘非天發安能為人鍾改寺

報慈德謹護列崇墉淪沒幾百載所遺惟巨鐘後當景
泰末移置薦福東千牛不可載百室或啟凶嗟此亦神
物似與守靈蹤蹟滅不能見大約聞老農但與看氣色
魏魏冠秦雍

彭麓山房宴作

南原雙白楊直上數千尺彷彿齊彭山不為后土搯山
房當其陰瀟灑殊曩昔置酒勸君飲慷慨盡三石歲月
不肯留人生豈常適試問華岡子誰見王維宅

觀刈麥

我從華山歸刈麥已大半自長安迤東實美如火炭緊
我返耕來此麥纔再見接歲禾不登寶玉成所賤周人
重農食特分田畷職公私積蓄繁詎有旱乾棘春首餓
莩多朝廷甚憂恤今日得佳物守護須謹飭黃金殪米
下其語殊謹直作詩告有位國寶在稼穡

五月二十二日東死踰旬僮子以其所為詩三卷
及雜集回文稿呈覽悲悼之餘令之繕寫成帙

用寄漢波先生為舉較定將圖入梓漫成二詩
以寫予懷

生兒望長成兒長吾已老自謂百事足詎知天橫早兒
童搜故書頗獲見遺稿文思顧歲稊曲折未探討豈羨
長吉名仍並酈炎好造物忌瓌竒成性返靈灑一讀
既一悲千讀則千悞倘假十年齡尚齊聖哲造元理香
莫測吾欲問穹昊

兒氣甚宏達少有丈夫容博識物豈眩逸思若風從俯

仰鮮中詘奮迅有孤蹤苟能假天命鬱為今詞宗顧我
忝明德神理奪所鍾英物且凋喪况云痴與庸豈無子
夏戚尚虞用昭凶緒餘今似君煩將附秦雍

寄太微

太微神仙人佳思逐雲上揮灑乾坤珍飄颻出塵鞅遊
宦建章宮才名藉方仰萋斐反南山閉門却交往我東
遊華峰每過時臨訪麾塵話羲皇拂劔悲魍魎或詣少
微原歌嘯歷蒼莽倚坐看雲生策杖聽泉響遐矚遠不

隔幽抱近彌想以茲酬宿心晨夕共歡賞別來忽五月
予衰殊非曩百憂結我腸許過約恒爽夢寐時見之太
息誚欺固新霽起微涼何不謝紛攘

示孫逸人

昔遇王子喬謂君有仙骨遨遊三島中萬里一超忽朝
餐石門霞莫吸海陵月朱顏范瑤輝長樂安可歇天上
降元鶴白日昇玉闕懶答麻姑書况肯事干謁我雖不
適意逢君欲飛越

鄱塘初浴

憶昔己卯春曾與涇野約因訪岐東君於茲共行樂登
山澗岐雍臨池事澡淪于時多雜人穢氣遠相搏微憩
古祠下魂魄苦銷鑠斜陽且銜山亟去步未却甃勉宿
橫渠是意竟荒落棄置至壬午來自鄱東郭賴有王李
曹先驅為充拓泉水煖且瑩一湯百疴掠始信靈物佳
翻嫌表章畧今此復臨池神思益恢擴瑩徹一如昔清
淨宛非昨形暢意轉新神適喜如躍嗟哉華清宮豈能

與之若作詩告後來此地不可薄

和六甥石室納涼二首

錄一首

老境百慮息所好在山林况此洞室悶塵氛安可侵開
簾見芳碧迤邐聞鳥禽因之感宿好笑歌梁甫吟丈夫
志四海何人識此心所以夷與惠曠世懷高襟日夕涼
風發逸興拂西岑沽酒共斟酌慚無絲竹音掃石卧煙
霧聽子廣陵琴

贈任主事少海

山居二十年未見蓬萊客秋暮邂逅君文彩甚彪赫因
讀治安策所擬胎不隔西遊遇中道探囊出素冊瓊瑰
射人目珠會杳今昔再拜覩宸章炳爍照光宅歎君英
妙時丁此滂沛澤宛如聞都俞依稀見傳說握手私謂
君丈夫志已獲尚宜踐所陳與世為表格

尹之先畫竹

虛堂挂翠筠玉濤滿壁起知君徹骨清志意特欣此興
劇須我題予好亦若爾回視桃李姿穠芳胡足齒

送尹員外之先

昔逢華陽君云為五帝使檢籙下九州為予泄元秘指
點峨眉傍謂有仙人氣仙人尹之先卓犖萬夫賢吐氣
成五色為世鼓朱絃絕調人莫知徒見春江篇予亦適
世者聞之心灑然恨不遂一見相與定草元天風自楚
下吹落岐周前相見即相信今歲成罕焉歎洽苦不久
俄赴天子宣餞酒單門下逸興浩難傳

夢中麓子

積雨晦臯陸我車不可前排徊望北墅迤邐橫雲烟退坐
草堂下籬菊燦且妍節物忽將改引杯吟太元微醉體
亦倦夢謁九華天仙人中麓子揖予出素編云是廣成
撰孰能叩其筌憶昔魏伯陽謂我骨當仙苦逐世人好
落魄武亭川綠業殆將滿數命或有然始思飲刀圭却
老覓長年語既執我手歡笑極周旋振袖出兩藥光如
朝日鮮挹彼松露下同吞各一圓五內脩清爽神采非
昔焉我居太白下君廬太山顛采芝拾瑤草食玉茹井

蓮欲會但瞬息跨鶴何翩翩赤松作參伍玉女侍几筵
翛然萬物表世網安可牽

雜興

許西亦佳勝日日有襟期田園俯川陸葵霍滿堦墀野
叟遺濁醪嘉樹過涼颺微曛上崇巘遐眺引東菑牧笛
風外來園禽鳴別枝睡足發新懷此心誰得知

觀魚梁

直西漳川水水煖有魚游僮僕值農隙揭梁漳川頭壓

石作深溜刺目避湍流欲辭餌鉤急反為曲薄留願為
梁上死不作餌中收梁上死何惜所畏餌中羞

潼關早發

早發潼關道微風動林木長峽百里去我行正僕僕大
風變頃刻萬里慘以逐樹杪聞過沙何須問平陸我口
不可開我身只匍匐輓車兩少年行行亦長哭云是閩
鄉人先世有官祿縣官急邊糧十戶九逃伏里長利賂
錢我故苦獨速太平作男兒庸調天亦福所恨身不長

筋力易羸蹙母寡已十年蕭條但空櫝有田不得畊有
事在忽條近歲嚴轉輸使者日三復迢迢百里途如歷
經緯軸我喉亢如火我行迅如翻吏來督我行躍馬恨
不騫使者討押錢鞭撻我服我冤向孰陳我淚向天
瀑語終心益傷聲吞色猶慙我感少年語涕泪泣如漉
皇明百年來萬姓各安育草木亦有滋少年爾曷顧凶
奴二三載驕氣如鷓鴣主將小兒行焉能辦鑊鏃爾居
見爾難不見九邊族一夫八人管剝削盡膏肉往者禁

軍出人家無完畜膂力代出役瘁敵內供穀土炕亦見
奪何況妻與僕此本亡賴子亡命入軍牘三帥皆詭隨
安知有鈴束少年爾莫苦主上正恭穆行當致雍熙邊
庭永安肅爾身當不勞爾家亦永復少年感我言再
拜向天祝願主萬年壽保我有饘粥願民如春草長養
無踐殞輓車向西去氣色猶睦睦

同段德光夜酌

白日西南馳人生直如寄芳林春風發百物暢以萃君

心諧金石良晤成斯醉于馬彌歡洽倏忽老將至孔跖
今安存何須辨真偽



對山集卷九

欽定四庫全書

集部
對山集卷十

詳校官中書臣孫溶

中書臣劉源溥覆勘

總校官檢討臣何思鈞

校對官編修臣沈清藻

謄錄監生臣徐汝雄

欽定四庫全書

對山集卷十

明 康海 撰

七言古詩

懷金可卿

憶昔與君別，悠忽今十年。不能見顏色，徒存秋夕篇。展
玩淚沾臆，相思隔萬川。男兒奮迅雖，有時歎息君才誠。
絕絃豈儒僅，能誦章句騰。踏青雲凌鉅賢，珍味安能通。

俗口廣陵之散誰可傳罕山金可卿三原馬谿田徒使
高名貫星斗科場不售惟我憐昔也令人羨三鳳今我
孤騫情惘然相如既有凌雲賦詎待吹噓方上天

送馬天瑞還京

庚申長安一見君知君氣蓋千人軍正德八年定蜀賊
延綏健兒如虎奔此時天子方西顧名公才將如雲屯
君從制帥適經過老眼拂拭知有人果然三月破綿漢
遂令巴蜀無風塵向也王師亦嘗奮山東河北根株盡

豈係將軍紀律疎由來戰士驍騰斬掃蕩寧夸廖賊
收笑談直羨終郎俊渭水秦山壯氣迴金臺恒嶽益崔
嵬相逢意氣還如昔愧爾經邦濟世才

秋風詞

長安道上秋風起吹入青門草靡靡客子攜琴燕趙來
一感秋風心欲死鳴鞭躍馬過我前那堪杯酒重留連
酒酣氣發百志奮談笑須臾空百年坐中歎爾壯士心
人事何勞問古今張倉亦能論刑法君平徒然卜六壬

仲尼治國苦不稱曾參事母猶難信時勢摧人者處生
英雄遇抑常遲鈍南山磊磊雲氣橫寒泉湔湔終日鳴
請君拂袖謝人世與爾常為谷口耕

秋雨吟

十日一晴晴復陰斜風細雨何浸淫山根泥滑寸薪苦
水面苔生平地深神怒天摧或如此已看百穀半將死
饑寒盜賊著處生誅斬翻憂亂兵起徵求無度民自難
諸公徒爾嘆微官豺狼當道捕不得三公列卿何足觀

忽憶成化甲辰歲公私充國網維繫皇帝臨軒發禁錢
細民尚作溝壑斃况復艱難至此時九重深嚴那得知
臺諫徒陳利害策閭閻不見寧息期斗粟尺布命所直
吏促官輸轉相逼甘肅縱橫土魯番商洛紛紜織染給
中丞受詔不敢來此地生靈一何極嗚呼斯民天所生
州縣相看何太輕祖宗宏業振千古陛下神武復英明
一朝收取壞事者會見爾曹雙眼清

送吳慎之令銅梁

憶昔與子遊鄉學短褐影影俱總角千人過眼無一堪
私擬君才當穎脫以茲常聽萬里鳴豈意蕭條飯場藿
我昔應時官翰林世間名士空相博轉覺君才近所無
垂老科場意羞縮奮迅因求勾漏聞聲華曄曄今非昨
苟能行事何足猜丈夫要見青天濶國家名公不可數
俱向專城事民瘼君不見漢庭黃霸與魯恭至今名譽
振天地何況當時為列公

寄張士元

黃金臺上雲依依黃金臺下水瀾瀾臣今萬里去辛苦
安可辭但願陛下壽萬歲使臣萬里無遺思祖宗洪業
際天地尺地皆土人咸臣之斬刈流徙惟上所為遐方
炎炎有肉不可食有酒不可卮况臣侍從邇文墀心之
彷徨宜在此惟願陛下有長期陛下神聖古帝少臣心
不為遐方老

瑞州太守行

瑞州太守鄭廷瑞瑞至之日賊乃驚手無寸鐵兵衛空

健兒聞驚皆逃避郡吏不敢更趨承苦諫當虞身後事
四境安危係此身太守一逃何以徇當衙一呼士爭奮
始信英雄氣有神賊兵星散城已保轉顧因知寇所巧
樊破毀柵斂近民賊失所資如逝鳥至今瑞郡立生祠
君與劉周如在茲丈夫尋常薄鍾鼎毀譽升沉何足疑
嗟嗟貝錦者誰子謗君翻使君名起蓋棺事定古所傳
才去幾時民若此天道恢恢監獨明區區庶子胡為爾

夜宴孝夫宅

憶昔正統天順間渭南薛丈同先子關內通稱夫子名
二老實為天下士以此通家數十年善行嘉言時在耳
後嗣全如兄弟親前修自篤謙恭禮往歲逢君巴蜀歸
厚意遙遙還若此愧我疎慵未敢當聞君談論心私喜
盛世自宜英邁人迂儒豈識經綸理蕭望難居侍從官
賈生肯與絳灌比司馬逍遙忽見疑誰知中道生萋斐
治郡無能返異才看花尚切羣公齒立壑徒深社稷憂
廟堂獨忍乾坤否春暮閒遊少華峯逢迎幸辱賢喬梓

握手那知感慨生
酣歌不覺希聲起
君臣之義君莫忘
還期三月下和陽
用舍自為大臣事
顯晦豈為吾道妨
君不見崑崙黃河天
上來銀濤雪浪如山
摧不遺涓滴
盡入海誰謂海門開
不開

與呂子發許西

蒼雲爛白日長並轡遊
辭曲房君去不來我心傷
山寂寂聞無侶
愁檢故詩歷孤嶼
孤嶼亭亭當大河
下有萬尺之洪波
洪波萬尺有時盡
此意悠悠君若何

夾河戰

故崇安侯譚淵隨文廟內靖至夾河御幄有虎
來犯淵引弓射虎死明日大戰淵死疑虎為淵
元身謂不可射歸諸理作夾河戰

夾河戰事已亟張御幄虎來逼將軍怒目射虎死來日
沙場身且殪元身之說古亦有將軍之射乃其守可使
身後殪毋使虎前走君不見軍中壯士空千萬倉卒虎
至無人見眼底不知報主恩何況明朝夾河戰

傷軹

軹可久之子族之子姓莫強焉讀書習禮駁為
成人倏爾告亡涕泗交頤哭之以詩志予傷也
吾宗有孫子玉質光嶙峋總好紙墨事敏捷如有神溫
克過諸父私為予所珍緝學綠野忘寒暑奮志直欲追
先民大美不竟乃夭折使我痛哭聞者辛汝死不復作
我哀誰可陳少年弱冠隨鬼錄命孀兄弟哭聲直上干
清旻埋玉於土幾時出荒郊日落惟孤墳孤墳三尺生

秋草愁殺東西南北人

秋雨嘆

去年秋雨苦淋瀝今年淋瀝更無敵自從初一漲潦河
至於初七聲逾激浸淫若遣太華崩轟厖豈但平川汨
百穀腐爛莎草長惟有芙蓉水中直

崩牆壞壁人夜號比鄰處處通波濤明燈執傘待天曙
片雲浮來聲益號富家或能飽鷄黍嗟嗟奈此貧兒曹
拽椽為薪麩為粥斗粟千錢肯相鬻

原上官道泥已深原下卑濕人怎禁四方極目盡明水
野菜可食何處尋絢塗匍匐寡筋力賓客逢迎甚胸臆
安得大禹鑿九州更使蒼生免昏匿

此雨初晴人亦狂為能洗却煩蒸涼那知狼藉遂如此
積陰鬱鬱行坐妨兒童階下戲舟楫風動檣帆行獵獵
不知何日墜蓮房亂向波心逐蓮葉

寄滕子冲

戊辰與子別京國一別十年如頃刻野人心性百事慵

尺書未入揚雄宅丈夫豪氣九鼎輕六品微官有何得
吾子風流近代稀新詩首首追曹植鵬飛鳳翥變化殊
龍舞蛟騰果安極有懷欲語誰可知尋常思汝心如塞
山東李夢弼河間李宗易人來往往寄我書兼有篇
詩如絡繹民懷昨日信亦至獨怪爾錫非曩昔直卿山
西消息無粹夫河內聲尤赫數君才名先後無義氣上
與雲霄浮愧我齷齪只飲酒未能彷彿身後圖前日客
從許西過歷誦諸君有程課此意蕭條久不聞私心豈

但同年賀廊廟山林各有懷好景不常時易蹉願君努力思古人人生當作萬年身有才上可報明主坐令四海承經綸許西山水亦非惡斷壁懸崖何磊落終南太白走其下清渭沂漳面相錯秋來朝夕雲氣橫喬木森森鳴鳥雀中情泮矣何所櫻舊日麤豪心漸薄或向西河學釣魚或向東原訪隱居割鷄飲如壑跣足蓬頭奚愧作譬如野鷺山鷄被樊繫一朝脫翅向空山玉柱金甍肯輕集達亦無所歡窮亦無所苦我曹心事久不白

禿穎安能為君數去年二月初經紫閣恠石驚湍陋天姥
其下一里秦草堂古人題詠橫如堵此時思欲與君遊
擊筑徜徉歌石鼓或時策杖瀑布間或時坐遠臨高岵
此意寥寥不復同因君歎息淚如雨

李節婦歌

鄉縣士大夫欲旌李銳妻之節南里子用之引
紀叔姬卒鄒之事謂不在厥居因賦小詩辯焉
齊之圖紀也紀侯命弟紀季以鄒入齊求後於

五廟由紀侯去國之後又八年而紀侯死叔姬以紀宗廟由鄒始返而居鄒以奉紀祠蓋有鄒則姬得以死國與銳妻欲死家而不可得者其事萬不同也而以此例之哉銳死父文圓挈家就選遂盡賣其田宅當是時銳妻雖欲如叔姬之居鄒得乎成化甲辰之厄關中老弱相食父子兄弟散於四方雖婦人無歸義當歸之宗國父母既死兄弟蕩然無存幸伯兄喬祿在故銳

妻往祿雖借債而居亦異諸他人之室也今以
叔姬之事例之不知節婦之事於叔姬何不同
也叔姬邦君之夫人有與君同死社稷之義節
婦庶民之妻居無定業朝債夕改又上制於舅
姑跡雖不同而心事一也夫道以無垢是尊婦
以潔身為操聖人之立教求其如是而已人豈
不欲盡年夫室以明婦人之義哉然翁姑怒而
去矣田宅盡矣欲死則弱息在抱圖存則兄弟

具遠加以年歲饑饉死者相藉使叔姬於此亦將若之何哉婦人不出閨門竇氏二女死於巖下彼巖下豈其家也苟無污其身而已矣此庶人之妻安可與邦君夫人比也匡章之不孝非孟子之辯後世何明大抵予之所著憂君子之論不明于時而已

武功節婦李銳妻節操直與青天齊夫子舅姑苦欲嫁不從見逐何所棲阿舅官去賣田畝妻孥俱作燕臺走

悲號隕絕夫塚邊血淚如波心欲剖遺息在抱求死難
欲守夫家豈能守吞聲自賃宗人居夜紡績織苟餬口
辛勤匍匐二十載息兒成長為人婦三十年餘舅死官
姑來置屋比舊寬小叔家口自逼仄豈容老嫗供姑食
紀侯去國紀季在叔姬故與鄒宗對先後不免舅姑嗔
立錐無地腸空碎小叔近又賣新屋西入汧陽不東復
身計蕭條兄弟踈安得不就寡女宿庶民自與邦君殊
貧人賃僦何弗居南里豈史苦執禮豈未盡諳胡氏書

莊公元年紀已拔宗廟所繫情難恕三年遺季存餘鄩
吾君既死身安極所以歸鄩死宗廟謂鄩如紀心所悼
秦人鮮義自古然父子尚有耨鋤較尋常豈異不顧親
區區嫠婦爾何人

聶孝婦歌

姑未老夫已亡事姑惟恐姑心傷妾幸不死得事姑姑
病經年惟妾扶但得姑好妾常侍那惜此身成骨枯可
憐阿母死時語願汝有婦還似汝不見賢郎喪汝時三

載居廬不出戶

十九日即事

養雛自恨羽翼短翼長飛去豈思返老鳥目斷東南枝
白日青天一何遠尾禿唇焦徒自啼啼殺老鳥雛詎知
願雛養雛還勝雛慎勿齷齪如老鳥

四月三日雨示德充

昨日有雨塵不灑今日雨多雲更長遙天四望無寸碧
野人稼穡何所妨頃聞江淮人相食父子不保况路傍

關中雖無橫盜苦邊餉轉輸日相望麥豆半為風雨蝕
我秋未布人皇皇晨興東出望雲氣晴天赤日心自傷
千歎萬息日將旻天風不動簾影黑須臾雨脚下平地
颺喧何啻萬馬力向夕雖看懸溜微達旦霏霏雨如織
喜聞優渥遍九土倏忽之間信難測天地之德本好生
大塊豈厭物生成人身痞逆百體滯氣運所生誰可明
豐年弗儉歟時極却與造化生攬槍安得官長息雜役
令此黔首俱深耕禁侈薄斂久自足何必義倉與長平

西谿醉歌

西谿草堂春水深西谿主人谿上吟割鷄把酒勸客醉
少小幾時衰老侵朱顏白日休自負請君試看芳春林
我聞此語倍感激世上幾人如此心明朝何不出美酒
更與東眺華山岑

示昭允及桐方等

為學不努力瞬息棄前功老夫衰境倦筋骨安能久坐
空庭中徘徊不見朗誦人迤邐宜羞長跪同昨日街頭

金少日八全言 卷十
黃髮兒今已倏忽成老翁諄諄念汝理不達切切寧為
虞困窮此心逐物返自易勉哉莫作長匆匆

題王秀才牡丹圖

何日到吾家牡丹應著花開圖一見興已發遙似當年
宴紫霞雕欄不受春風抑綠葉紅蕤舞風力終日迴旋
不肯休根株苦被丹青匿遠路遭洄銷客心夢魂惟在
草堂陰牡丹牡丹吾語汝三月八日始穀雨

長安壽趙封君歌

客向華山去過宿長安坊明日復延佇大醉使君堂使
君之父松鶴翁銀髯雪髮來從容見我更取大斗出一
飲已傾三百鍾匆匆數語見胸次四座通看獨神異此
翁本是天上人世間圖畫空相似徂徠之松千尺長終
日紛紛雲氣翔南極老人跨鶴至其下可許尋常當翁
言明日是初度滿庭賓客如煙霧使君自喜春日長天
際誰知有仙婺靈藥閃爍堆玉盤持以贈翁翁自看一
粒便可八千歲幾度咲觀滄海乾我執翁手為翁語世

上如翁幾人許生兒不忝杜與房舉手爭看喬共梓羣
仙今日上翁堂何以贈之雲錦章綠衣先見二千石使
翁姓字千載香

醉別王侍郎歌

侍郎王公蓋以都御史撫關中上疏乞休因援
筆賦此以送

春陽遲遲倉庚鳴我公東歸旌旆揚蒸黎連絡啼路傍
慈母欲去安所望牽帷扳駕心皇皇行道之人咸感傷

繫自我公來撫堂吏就典列民用襄劑量紳縮心百方
拯拯提挈如被戲使者冠蓋徒相仍固閉不得為民殃
文移反覆千萬箱借措却惱司空郎公身雖去德在民
公德在民民忍忘掇拾民意述此章惟公保愛履嘉祥
華山高高摩穹蒼大河逶迤接扶桑西土令聞同穹長
秦民世世賴休光天子仁聖思股肱公當不久還巖廊
公德旁布四海康千秋萬歲永壽昌

沂東藝圃作

我非漢陰叟灌園漳水東處世本無機巧心胡為桔槔
懸此中園丁再拜向我語此意千古誰可通舟車亦是
古帝作胡不辭去存古風言者自有託讀者自無窮坂
泉之戰至今誦安用區區矢與弓

簡華巖

常作華山遊遂為華山客愛君小樓當華山日日開簾
玩山色偶逢方平跨鶴來握手而語若有得便欲同君
鍊九霞勿使紅顏坐銷歇

五言律詩

同年劉丹稜見過道及己未下第會孟津塗中事
感而賦此

自別河陽驛於今二十年
羸屣憂正急傾覆意常懸
共濟歡無極同歸事可憐
此時俱尚老語及欲潸然

八月初十日仲修見過

長安相餞後候忽又秋風伏枕渾三月
徵醫賴兩公世人憎賈傅予意得王充
努力趨吾道乾坤若轉蓬

釀酒

吾道仍須酒秋分釀更宜便當炊百石猶未足千巵行
樂年空暮聞歌日尚遲風流杜陵老傾倒是吾師

懷太微

太微清苦士弱冠即知名英氣千人廢新詩四座驚愛
身辭一芥當士陋諸生可惜龍光劍悠悠閉斗城

答伯循

抱病臥林壑思君安可親忽蒙枉書札便已愜心神曲

藝竟何益虛名常愧人
汴東有垂柳堪送百年身

喜仲默至

二月高陵縣逢君發慶陽
十年方邂逅百歲幾徜徉
詞賦名須久安危望已長
青尊今夜月好醉許西堂

彭麓詩和白坡提學與諸公見過之作

返耕得茲麓習靜欲長年
山水向春碧烟霞當暮妍
結廬垂四壁枉駕辱諸賢
遣興沽村酒呼童鳴綠絃

八月十五日喜明叔見過

長空雲氣靜今夜月偏明且喜高人至猶憐湛露生
金波搖桂影彩鳳落瑤笙瀟灑王夫子飄飄共此情

課子

爾愛文章事應知著力難涵容須有日操縱亦多端
大義如分燭圓機自躍丸果能追古作先向老夫看

有所思

繫自辭京邑遙遙十六年婚姻謝兒女遊眺歷山川
總謂終聊爾誰知事偶然憂來唯灑淚魂逐夜臺邊

覽鏡

愁裏窺明鏡，驚看白髮多。行年自驅迫，服食謾如何。有
相終巖穴，無機任薜蘿。平生憂國志，何惜酒中過。

綠野書院作

不到幽棲處，悠悠將十春。古堂懸見日，靜地寂無塵。俎
豆思周禮，威儀憶魯蘋。愧非程伯子，何以坐松筠。

次張闇夫見過之作

獨好中林隱，因家清渭川。園開溪盡處，山合水西邊。曲

藝明時棄長歌稚子傳已深疎曠志不是欲遊仙

二月十一日同德充弟憇許西觀杏花因共小酌
出郭望精舍滿牆皆杏花香風當戶合艷影入林斜日
煖烟生玉春晴錦映霞興來呼酒坐不必問年華

高陵道中懷呂仲木

寂寞高陵縣慙懃懷大防義於昆弟切情視范張長累
辱馳音問聊能達報章總令瞻第宅那復共徜徉

渡渭

吾亦愛滄洲春風信所遊不須歌桂棹渾勝坐蘭舟濁
浪排風起輕帆及岸收稍東瞻太華遙在碧雲頭

過劉水部故宅

水部風流古云亡亦有年重來因問訊孤坐思淒然孫
子猶儒服門牆托市廛向時豪爽論誰為世人傳

涇陽道中懷懋君

官舍草初青君應坐小亭謾吟誰共續高論我常聽莫
歎馮唐老終期阮籍醒由來丈夫志唾手出青冥

望歌湖城東別業

自出華山道時時懷此翁名園春定好佳節遠誰同社
稷思君實文章畧季通望中歡喜極若坐小樓東

鹿苑懷太微

鹿苑何王殿明時尚賜秦芳林春礙日幽草晝眠麕
畝餘生計乾坤信此身西京誰欲賦韋曲有詞人

望龍池懷汝濟吏部

小殿俯芳林丹臺挹翠岑重來多好興孤眺愜春心時

序關華髮丘園受短吟如何韓吏部已放二毛侵

望鄠

客謝鄠橋道逶迤紫閣陰雲霞餘夕照花柳暗春林燈
火城中出星河望裏沉不知王逸少何處賞偏深

漢陂宅逢敬湖

方作城南別重為鄠杜逢宜期塵霧裏今日見人龍邂
逅非無意醅醕諒可從明朝予北去何處望仙蹤

水北山房作二首

錄一
首

水北君歸隱匆匆十五年我來重極目疑似岳陽川樓閣參差裏亭臺杳靄邊鳥聲聽不盡花底有鳴絃

經暖泉宅

二曲交遊客如君信不多幾時違咲語荒塚已烟蘿却望題詩處其如灑淚何謾看憂樂事千古一南柯

午霽發彭麓

復從車馬去何以遂襟期始信山林趣全歸燕暇時霽雲隨望薄流曜落秋遲不及東巖子常啣濁酒卮

過春雨亭作

再過此亭下森疎真可人
樊牆俱勝昔花柳忽如春
總得林間趣偏宜物外身
脩篁軒後出何啻萬竿新

波頭

回首雙流細森疎萬木長
遠溪蒲粉落夾路稻花香
所向皆殊絕平看却渺茫
幾時同鄩叟伐竹構茆堂

華州逢楊重夫

一自京華別悠悠十七年
形容常入夢笑語竟無緣
豈

憶窮冬日相逢華岳前無能共杯酒相對益凄然

渭南逢楊靜修韓秀夫孟望之三君子

詣華情空切相過意已深那知百年裡又此一沾襟兒
女方麤了存亡忽見尋吾生何日定對酒若為心

贈平田

不見平田子匆匆已二年再聆絕交論應笑養生篇晴
日園花細春風榭柳懸不知遊樂處誰是竹林賢

臨川寺與鄴令王念覺夜坐

多君省春野逢我過仙宮
共宿臨川寺徘徊及夜中
絃歌興漢邑恭儉即郊風
更聽憂時論何慙底柱功

終南路氏少憇

不到幽人舍匆匆又五年
檻花交砌密園果出牆懸
夾路皆清蔭當階過碧泉
微風沾客坐吟望興翛然

再用漢陂韻答希大

羨君天下士猶戀碧山遊
盛世須英物明珠肯暗投
秋風桑柘里晴日鳳凰樓
語及箕裘事生兒已食牛

栗為許邀萬柳莊集夜坐率爾有懷

汝向名園去佳遊興若何柳溪須對月花塢且停歌不
寐杯空瀉微吟思轉多老來心數仄徙倚立庭柯

靈寶客邸逢慎之

客滯燕臺久春深始到家異鄉驚見汝歸思渺無涯但
酌弘農酒休言杜曲花我來應首夏知剩幾枝斜

沂東亭子閒坐二首

錄一首

掃地坐芳草闌斑如錦茵况有青蓮幕偏宜烏角巾經

綸辭壯志萋斐得聞身不作
醅醕飲桃花亦笑人

湯泉亭子小坐

山雨幸初霽微風猶峭寒
峰高常帶雪湍殺不成瀾
野鹿含芝過山鷄隔竹看
碧桃多半落若可奈春殘

真空寺

拂霧尋山寺籃輿上轉輕
曉雲生石細旭日映巖明
梵磬遙空出天花夾路迎
何須似摩詰方是學無生

寄翟石門

今日沂陽發知當宿鳳翔中秋亦何幸同子浥清光巖
外來旌節雲間下鳳凰白頭踈曠久徙倚望原岡

奉天別漁石司寇

臘日暖如春君歸謁紫宸一尊奉天酒千古五陵人劍
佩勤邊遠風雲入夢新明時逢聖主令世浥清塵

寄壽邢母

近日觀風使賢郎獨擅名熊丸勤昔教鳳誥逝金聲八
表慈闈福三時令子情瑤池靈藥下可上百年榮

五言排律

奉壽東原先生

間氣扶鴻化昌時得鉅儒我師關輔彥高義古今逾執
禮欽程伯言文陋董狐數竒場屋蹇道在性情俱未薄
常州幕何慚楚澤虞居貧餘豈弟望重極樞趨桃李乘
春徧芝蘭接歲殊素心原不染櫝玉詎求沽遲日明仙
館靈光拂壽圖願食千載藥與世作規模

七言律詩

得粹夫書

十七年來閒濶情
三千里外惜羣鳴
開緘不覺懸雙淚
欲見還知隔一生
王屋空聞小有宅
終南今作漢陂行
舊時多少雲霄客
屈指何人記昔盟

寄李永裕二首

錄一首

三春數枉故人書
去使虛無報德疎
幸有輜車堪問訊
誰能感事不躊躇
西亭素壁愁經眼
此日安危切跂予
待得昇平十年後
東岡休負草堂居

獨坐

梓里逍遙又一年
風光何處不堪憐
鳴禽應谷聲逾碎
露菊侵堦影自圓
無病有時看碧水
多情終日臥蒼煙
斜陽牧笛從吾意
漉酒呼隣興渺然

秋意

此日秋風絕可人
年時尖溽尚傷神
且看曉色清如洗
轉覺寒光翠欲頻
松下有時雙鶴舞
溪邊無數白鷗馴
便須酌酒酬心事
莫謾支吾愧此辰

答蔡承之見贈之作

故人清晨來叩廬野人尚作深巖居握手掃地坐相語
憶昔交遊俱不如情真喚婦饌鷄黍道厚撫躬慚緒餘
多病尋常少筋力感慨直欲凌空虛

十六夜有雲翳薄月尋復開霽

昨日見月賞不及今夜月來雲亦開已促新詞翻楚調
却疑清影落陽臺水輪果愜詩人意玉椀當酬白雪才
新病欲瘳仍諱飲不勝高興謾含杯

從仙遊行入黑水谷五里草房凹作

谷口尋源入漸深回巒相接晝陰陰嶼禽掠水應愁下
野鶴穿雲太不禁暝接草房烟漠漠樹當岩岫綠森森
重遊始得名山趣老去翻慚少日心

留別太微

養生無狀病經旬藥裹緣君更有身明日西歸休恨別
他時相見却驚人稽康徒作形神論魏野終非翰墨臣
早晚南山雲氣發請君天際望綸巾

送張汝賢

山居久謝風雲使今日西堂為子開三百同年誰更好
八千滇水幾時來循良作郡紆民力落魄逢人愛酒杯
青鏡霜髭吾亦老驪歌汀柳不勝哀

江頭

江頭橫槩任羣堯過臘經春未息蹤祇以官輸相逼迫
豈能比屋自從容尚憂巴蜀仍多事莫倚秦雍足利鋒
聞道軍衙更節鎮東方黎庶益洵洵

答用昭德光

年來唯與白鷗羣
春暮誰知兩見君
幸有青尊須縱飲
况當明月更論文
山房迤邐濃花發
草閣迂迴野徑分
長句短吟俱大雅
朱輪華轂正浮雲

十六夜次韻

不見清輝又隔年
人生能得幾回圓
登樓漫落千山雨
憶第空瞻萬里天
欲遣倦懷須貰酒
為酬佳節強登筵
亦知潦倒為吾事
燭影歌聲入夜偏

憶昔

憶昔承明侍從朝
先皇端拱似神堯
萬家簫鼓傳雙闕
三殿風雲護九韶
劔佩緩歸青瑣夕
蠻夷通款越裳遙
可憐湖上龍飛後
人事官曹漸寂寥

過渭川草堂

渭川草堂清渭濱
無數好花開暮春
小牕不受風雨逼
爛醉豈憂兒女嗔
數椽自可藉疎豁
百畝誰曾辭賤貧
憑君分我萬竿竹
令我因以東卜鄰

薦福寺將發值敬湖太微二子來餞

禪堂晨起惜清幽野客西歸興不休
兩妙過予應恨別隔年同此足消憂
林花掩映香臺落旭景霏微寶殿
浮自古城南名勝地何時極意徧追遊

駝峯絕頂眺望

在岐山

駝峯孤眺鬱嵒我自覺西來樂事多
千折笑看洪水細雙巖不見白雲過
周公禮樂空遺廟謝傅風流有浩歌
太白南瞻真咫尺關中佳氣近如何

第一關次聯句韻上邃菴先生

拂曙披雲到此關，喜隨綦履望名山。
芙蓉半出青天外，沆瀣中分白石間。
定有神功扶帝力，豈須靈藥駐衰顏。
攀蘿未覺尋行倦，細和新詩及暮還。

趙使君後堂同東谷太微太華諸君子集

使君愛客宴閒堂，客醉歌狂殊未央。
自以笑言偕四俊，虛疑時序到重陽。
炎天過雨先銷暑，美酒當筵豈論觴。
旦日東征更踈濶，贈予何惜遠遊章。

羣公相見亦憂時事執推移却未知豈有明王崇侈好
總緣中使辱恩私典刑具在公平法臺諫何勞激烈辭
拚塵漫思忠獻議英雄當事蓋如斯

荅希宋侍御雨中見懷

空堂雷雨送微寒愛汝蕭蕭竹萬竿安得雲霄乘羽翼
一過臺榭重游觀園英帶濕皆凝碧牆柿須秋始放丹
我已炎蒸愁作客君應迤邐卜新歡

樓觀二首

仙家樓觀俯層岑春色逶迤萬木陰檻外歌聲初迤邐
寰中人事幾銷沉誰將玉醴傳金椀自欲浮生憩此林
本是無心名利客悔教華髮到如今

危樓迥對一峯孤哀壑平連萬頃蕪摩詰畫圖空掩映
伯陽道德宣虛無方西澗谷漢馳道直北河山周故都
風土不殊人事異誰將縣徒問司徒

三月初九日過澣西看牡丹

今日澣西開牡丹攜兒澆酒坐相看穠花自識春風好

接葉休為夜雨殘
深院紫泥巢翡翠
層樓朱檻宿鸚鵡
衰容任遣韶華逼
幽抱常教酩酊寬

年年高宴賞花天
明日花開賞更偏
昆弟總能吟五字
兒童不必報三鱸
承顏幸有步兵菽
行樂何須盧女絃
已促行厨烹玉鯉
好隨佳節醉瓊筵

初八日候諸公不至同岐東南川於澣西賞花各

賦七言律 二首

佳辰每作看花燕
老去風流亦可憐
草閣於吾非漫興

花谿同汝試鳴絃紅英且莫交春暮綠醕還期醉月邊
千古豪華誰更在請將青鏡問流年

卜築於茲三十春年來忙似宦遊人羞將白髮隨兒戲
且向青山著此身海內賓朋消息斷林間風月酒盃新
長吟何必如張翰短酌從他笑李紳

彭麓山房答太微見候

君從二曲城西去我向雙崖月下歸夕日烟雲迷遠寺
晴天花柳暗春扉嬌鶯過嶽娟娟語乳燕衝波故故飛

對景相思期痛飲憑君莫自惜羅衣

奉天逢錦夫望之汝公三君子

諸君並是風流客殢酒微歌我不如十載飄零渾一夢
百年問訊祇雙魚詩篇尚憶同趨省組綬空憐共直廬
白髮青袍吾獨老媿從揚子問潛虛

贈行邊使

列鎮迎恩介冑雄赭袍遙映塞雲紅武臣敵愾餘虓虎
聖主憂時起臥龍天上使星臨閭外斗間紫氣照關中

長城萬里今增重不數平淮一綫功

五言絕句

渡渭南望二首

錄一首

水際孤雲合船頭細浪生青山飛白鷺綠竹轉黃鶯

十月奉迎長洲叔泊諸昆賞花值雨不果

二首錄一首

已辦花前飲花神豈避人欲將花盡發故著雨留人

七言絕句

扶風道中十四首

錄四首

郵亭新柳厭春陰
驛路黃塵銷客心
碧水蒼山予未晚
衰容短鬢爾何侵

鳳泉東是美陽城
秦后離宮跡已平
細草不知龍輦去
城邊日日喚愁生

許公碑石尚參天
科斗消磨不記年
公子經綸唐第一
鄉邦述作近誰先

夕陽隱隱抱孤村
知是何王晾馬原
龍種自隨彤蓋去
人烟常傍廐門繁

去年二月九日與德充德一二弟洎子栗過此各
賦小詩十餘首今日杏花開二弟復至悟省舊
作有待得函關公事了年年沉醉杏花天及年
年花發年年醉更乞天公六萬場之句因次原

韻再賦十首

歲歲看花花已飛花神若恨賞來遲今年坐賞花纔發
却到春風第幾枝

新來無事已堪憐春服初成二月天同醉花前不同賦

轉看金谷意蕭然

此日庭柯盡著花老夫逸興正無涯
崦西莫羨千株柳水際先看一帶霞

五十五年纔不忙清尊同汝有誰妨
行歌正恐花陰短大椀那論飲興長

謾省年時醉裡詩便須極意飲金卮
幸無辛苦輸公事却看風流在水涯

西堂新釀酒如泉還我南窓酒聖編
有景便看看便醉

古今人裡讓誰先

繁絃劇管坐花前轉覺春園花可憐若把花枝對明月

紅英笑殺鏡中天

我醉君歌興灑然不知花影坐中遷須教酩酊同今日
那許蕭條似去年

繫自還京願不違柳邊花底坐忘歸新詩美酒朝朝樂
莫管春歸花亂飛

好句吟成便寫牆老來日日為春狂天公有意隨吾好

別借春遊十萬場

呂子北泉精舍宴集

北泉精舍菊花開節過重陽我始來坐對菊花酬節物
危樓南眺望登臺

自擬重陽醉此樓不堪詩酒作淹留狂夫老去情逾放
笑折黃花插滿頭

去年與客賞重陽痛飲溪亭遲日光今日月明情興爽
何辭三萬六千觴

月白花黃酒又清長河恨不入杯傾人間富貴同飄瓦
何物空教誤此生

此生疎曠絕堪嗔遇酒逢花便不馴身外悠悠無染著
胷中的的有陽春

對山集

卷十

對山集

對山集卷十

對山集後序

蓋對山太史崛起前明中葉之際與李何王邊倡為古
文漢魏詩歌一時宗尚所傳有對山集若干卷校訂於
漢陂彙輯於太微品薦於太倉王麟洲搜羅互異棄取
不同而為一再刻以行者翁撫軍潘提學也顧書雖經
傳播海內然而板俱散佚無存是以購求維艱學士家
藏者絕尠至我

朝康熙某年同邑馬方伯重刻之金陵省署卷帙視他

刻為獨繁而對山之詩若文斯備載無遺矣乃先後數刻頗皆有魯魚豕亥訛謬殊衆且或雜砒砒燕石以混并其中甄別匪易讀者茫然西峯先生於是就故所藏太微元刻選定甲乙存之篋笥然未嘗遽出示人顧或舉以訓洲也今年夏四月邑侯敬齋馮公聞之謀付剞劂迺覆取而詳擇焉更叅之別本共得文若干首詩若干首僅計數萬言分為十卷於虜精已夫對山以質直之筆抒寫胸臆其所論述率取意達以止儻爽高邁為

能絕去雕繪之習而言簡情該古氣流溢味之靡窮蓋
得子長氏遺韻者而五七字古歌行亦有鮑謝風固宜
西峯先生篤好而深取詮次考訂若紫陽之於昌黎也
刻既成用敢紀諸其後俾讀是集者知所由用心焉昔
乾隆二十六年歲在辛巳秋七月戊午邑後學張洲萊
峯書

